

四庫全書

集部

欽定四庫全書

集部

御訂全金詩增補中州集卷十四

五

詳校官中書_臣張虎拜

主事銜_臣徐以坤覆勘

總校官編修_臣王燕緒

校對官編修_臣勵守謙

謄錄監生_臣黃嘉績

欽定四庫全書

御訂全金詩增補中州集卷三十四

劉昂霄

一十三首

昂霄字景元別字季房陵川人父俞字彬叔明
昌二年進士仕為承發司管勾泰和中予識景
元於太原人有言是家讀廣記半月能背誦者
予未之許也戲取市人日歷鱗雜米鹽者令讀
之一過目無脫遺大率景元之學無所不闕六

經百氏外世譜官制與兵家所以成敗者為最
詳為人細瘦似不能勝衣好橫策危坐掉頭吟
諷幅巾奮袖談辭如雲四座聳聽噤不得語故
評者謂承平以來王湯臣論人物李之純玄談
號稱獨步景元則兼衆人之所獨愈叩而愈無
窮不知去古談士為遠近餘子不論也嘗用門
資叙調慶陽軍器庫使不就諸公方薦試宏辭
而景元病不起矣臨終夢賦山泉云帶雲縈遠

澗和月到疎林又云萬里馮唐老中年賈傅歸
未幾下世年三十七

補歸潛志劉昂霄景元陵川人博學能文從屏
山游又與雷希顏辛敬之元裕之善嘗由任子
入官已而隱居洛西山水之間踰三十病卒其
詩有云歲月消磨詩句裏河山浮動酒杯中迢
迢萬里乾坤眼凜凜千年草木風元裕之嘗稱
之余恨未之識也

中秋日同辛敬之魏邦彥馬伯善麻信之元裕之
燕集三鄉光武廟諸君有詩昂霄亦繼作

積甲原頭漢闕宮登臨還喜故人同
迢迢萬里乾坤眼凜凜千年草木風
歲月消磨詩句裏河山浮動酒杯中
極知勝日須轟醉直待銀盤上海東

趙村晚望

放眼東原上風烟接渺茫
林疎出村落野迴散牛羊
天浮元氣山河半夕陽
登高一長嘯未覺阮生狂

送裕之往洛陽兼簡孫伯英

洛水嵩山壽樂堂
每從熱惱得清涼
竹牀石枕應無恙
尚可分風供十方

題裕之家山圖

萬里神州劫火餘
九原夷甫有餘辜
作詩為報元夫子
莫倚家山在畫圖

同敬之裕之游水谷分韻賦詩得荷風送香氣五

字

各賦
一首

招提有勝踐日暮一經過何物媚游人微風動池荷
尋幽意自愜況與佳人同俗物不到眼談笑來天風
敲門看修竹重理舊年夢上山復下山清風管迎送
寒泉漱雲根湛然涵鏡光誰知一滴味中有曹溪香
迂辛與臞元得句尤有味顏垣斂瞑色深竹貯秋氣

敬之句秋氣
裕之句也

色 瞑

寄申百勝三首

直氣南山相與高爭教塵土浣青袍征科頗似曾料理

差勝參軍作馬曹

執版那能拜下風
世間禮數困英雄
狂歌醉舞人誰識
憔悴通泉郭代公

連昌能隔幾牛鳴
不見令人鄙谷生
乘興時思一相訪
劇談豪飲見真情

游五渡谷

南山如碧環缺處
蒼崖開當年造物手
辦此何神哉
睨倚天壁千古封
莓苔源源萬斛泉
飛出重山來白龍

三百丈行處鳴春雷巨石若棟宇磊砢相推排跳波與
濺沫餘怒猶喧呶我來值杪秋萬壑風聲哀黃花雜紅
樹錦繡紛巖隈奇勝夙所貪欲去仍裴徊題詩還自笑
媿我非仙材

附元好問劉景元墓銘景元年十六七許時其
先人朝請君官四方景元留學陵川已能自樹
立如成人老師宿學多稱道之而朝請君獨未
知也及罷官歸行視景元所舍見其架上書散

亂無部帙意不憚因問讀書有後先汝寧亂讀
耶漫取一書試之則隨問隨答無所忘失朝請
君始大驚撫其背曰及吾耄老當見汝聳壑昂
霄時耳乃名之昂霄字景元別字季房泰和中
予初識景元於太原其與人交不立崖岸洞見
心肺世間機械皆不知有之河東梁仲經渾源
雷希顏王官麻信之皆海內名士交久而無間
言人以此多之至其善惡太明黑白太分則亦

坐是而窮也初舉進士不中以廕補官調監慶
陽軍器庫非其好也諸公期以明年薦試辭科
而景元病不起矣正大乙酉夏予自京師來哭
其墓太夫人謂好問言吾兒有當世志今鬱鬱
死矣子與之游最為知己當為作銘無使埋沒
也好問泣且拜曰銘吾兄者莫好問為宜乃作
銘景元陵川人自言系出楚元王交祖諱溥不
仕朝請君諱俞第進士官至管勾承發司太夫

人上黨宋氏封彭城縣君妻永寧李氏子男一
人名庸女一人尚幼以元光一年六月十三日
春秋三十有八終於永寧之寓居權殯郭西南
一里將以某年月日舉二世之柩歸葬陵川之
先塋銘曰深心而文洩人天和聲光一流有物
禁訶君起太行學自為家元精當中散為雲華
有發其談瀉江傾河坦其正途不涉誕夸有喙
三尺有書五車噤不得

一本
作時

施萬古長嗟望君

天門奉璋峩峩蓬蒿一丘窘此澗阿天乎天乎
命也奈何

田紫芝

三首

紫芝字德秀滄州人父濟以蔭為部掾德秀少
孤養於外家定襄趙氏故多居於忻年十三外
祖廣寧治中命賦麗華引語意警絕人謂李長
吉復生資性穎悟一覽萬言年二十讀經傳子
史幾徧為人疎俊而以蘊藉見稱與同郡王元

卿齊名貞祐初避兵臺山倉卒為游騎所馳遇
害時年二十四士論惜之

夜雨寄元敏之昆弟

時年十六

醉夢蕭森蝶翅輕一燈無語夢邊明
虛檐急雨三江浪
老木高風萬馬兵
枕簟先秋失殘暑
湖山徹曉看新晴
對牀曾有詩來否
為問韋家好弟兄

亂後登凌雲臺

愁思紛紛不易裁
凌雲臺上獨徘徊
亂鴉背著斜陽去

寒鴈帶將秋色來破屋無烟空碎瓦新墳經雨已蒼苔
天翻地覆親曾見信得昆明有劫灰

冥鴻亭下第後作

眼底功名一物無飛揚跋扈竟何如青雲岐路多辛苦
賴得皇家結網疎

附續夷堅志紫芝字德秀滄州人其父濟為部
掾娶定襄趙氏生德秀於中都生數月隣李媪
見之潸然出涕人問之媪曰老婦一兒子生二

十五歲在太學有聲以去年亡是兒極相肖也
吾兒死時老婦嚙其面破此兒面瘡口痕宛然
可以證前身矣德秀幼孤養於外家多居於忻
六七歲知屬文一覽萬言十三賦麗華引詩意
驚人有李長吉風調十六與予游從曾大雨後
有一詩見示云云予兄敏之私謂予言詩首二
句非鬼語乎吾謂其非壽者相也果以弱冠下
世云

王萬鍾 三首

萬鍾字元卿秀容人父甫字用之通經史淳質
有儒行亦以知醫見稱兄萬石字器玉住太學
有賦聲用之妻死不更娶二子俱無家室井曰
之事率親為之貧居陋巷中破屋蕭然不蔽風
雨而絃誦之聲不絕也元卿少有逸才讀書有
後先不欲速成詩文閒適似其為人客至清談
終日人不敢以俗事浼之與同郡田德秀齊名

號王田評者謂規製宏博王不及田而瀟灑無
塵土氣田亦非王比也元卿嘗有詩寄子關中
云千里呂安思叔夜二年社燕伴秋鴻賦梅花
云漢宮月下三千額好在春風一抹痕哭吾兄
敏之云蘭逕水流三月暮桂林風落一枝春古
詩尤蕭散有自得之趣兵火中皆亡失之矣初
用之聞北兵入塞即以吾州為不可守去之太
原五年不敢歸貞祐二年州破死者十餘萬人

而用之亦以是日病歿於太原較其時皆三月三日巳時也人謂用之先見固可稱然生死定數亦自不能免云元卿父歿之後與其兄居於平晉之金城里明年兵復至兄被害元卿欲收葬之時游騎充斥親舊勸勿往元卿持不可曰兄死不收留此身欲何用耶流涕而去尋亦被禍時人甚哀惜之元卿長子一月死時年二十七矣

春宵

風尖月細春猶淺
酒冷燈昏夜向深
人在西軒愁不寐
十年閒事總經心

元氏桂軒為敏之賦

簾捲堂前桂子涼
一軒燈火夜初長
月中春好元無價
天上風來別有香
棠棣一家同映秀
詞林百世繼餘芳
閒花野草空無數
掩盡人間獨擅場

江村風雨圖

秋風撼撼澹林暉烟靄昏昏失翠微一段尊鱸江上興
蓬窓岑寂夢魂飛

雷琯 一十九首

琯字伯威坊州人以薦書從事史館調八作司
使博學能文時輩少有及者并州人李汾與伯
威同在史館以高蹇得罪伯威作詩送之頗譏
翰林諸人不能少忍至與一書生相角逐使之
狼狽而去有郎君未足留商隱官長從教罵廣

文之句又云明日春風一杯酒與君同醉信陵
墳人甚稱之

補歸潛志雷琯伯威坊州人父秀實亦名進士
伯威博學能文作詩典雅有佳句時輩稱之初
余過陽夏聞其名及一見傾倒歡甚後伯威赴
葬余先子淮陽為誄文雅澹可喜余以示雷翰
林奇之已而以家貧母老為國史院書寫秩滿
為八作使亂後南奔道為兵士所殺年未四十

哀哉伯威為人議論刻深然於文字甚工細每
酒酣談說今古莫能窮又欲取奇異功名自喜
亦不羈之士也

信陵館酒間二首

閒過信陵飲有懷信陵君君去日已遠誰憐抱關人徑
攜一壺酒往酌公子墳墳科久已平墓木幾為薪泉扉
鎖長夜千載不復晨昔與賢俊遊今為狐兔隣豪貴竟
安在念之心紛紜有生會歸盡但恐後無聞此意不可

必且醉梁園春

維昔有迂叟樹桐彼高岡殷勤為封植遂欲棲鳳凰桐
生日已長鳳來殊未央維鳳覽德輝非時詎來翔枝幹
枯以死志願終莫償憶在西周初飛下岐之陽徘徊不
能去和鳴聲鏘鏘文王既已沒千載徽音亡咄爾叟何
為而欲發其光空令枯株上日晏啼鶯鶯

客有自關輔來言秦民之東徙者餘數十萬口攜
持負戴絡繹山谷間晝食無糗糒夕休無室廬饑

羸暴露濱死無幾間有為秦聲寫去國之情者其
始則歷亮而宛轉若有所訴焉少則幽抑而淒厲
若訴而怒焉及其放也嗚嗚焉悵悵焉極其情之
所之又若弗能任焉者噫秦子父母國也而客言
如是聞之悲不可禁乃為作商歌十章倚其聲以
紓予懷且俾後之歌者知秦風之所自焉

扶桑西距若華東盡在天王職貢中一自秦原有烽火
年年選將戍河潼

春明門前灞水濱
年年此地送行頻
今年送客不復返
卷土東來避戰塵

盡室東行且未歸
臨行重自鎖門扉
為語畫梁雙燕子
春來秋去傍誰飛

灞水河邊楊柳春
柔條折盡為行人
只愁落日悲笳裏
吹斷東風不到秦

纍纍老稚自相攜
側耳西風聽馬嘶
百死纔能到關下
仰看猶似上天梯

上得關來似得生
關頭行客唱歌行
虛巖遠壑低相應
轉見離鄉去國情

前歌未停後迭呼
歌詞激烈聲嗚嗚
天下可能無健者
不挽天河洗八區

折來灞水橋邊柳
盡向商於道上栽
明年三月花如雪
會有好風吹汝迴

行人十步九盤桓
巖壑縈迴行路難
忽到商顏最高處
一時揮淚望長安

西來遷客莫回首一望令人一斷魂
正使長安近於日
烟塵滿目北風昏

陽夏懷古

短衣匹馬西北來十年去國隨風埃
解鞍呼酒歌一曲
玉鞭倒捉敲金壘君不見項王臺
昔時崔嵬今已頽
秋風蕭瑟吹草萊又不見漢王城
昔時嵒嶮今已平
寒烟寂寞啼鼃猩
牧童擡頭學楚聲
野老扶犁城上耕
耕勢不斷楚聲哀
行人欲去還徘徊
劉項英雄安在哉
人間

俯仰易陳迹閒身健在須銜杯

龍德宮

紫簫吹斷綵雲歸十二樓空盡玉梯綵仗竟無金母降
仙裾猶憶化人攜千年洛宛銅駝怨萬里坤維杜宇啼
莫倚危闌供極目斜陽更在露盤西

南國

南國春生江水肥烏檣風扇錦帆歸吳兒日暮棹歌發
驚起鴛鴦相背飛

古意四首

美人傷獨宿窈窕春閨深素手卷翠被當牕調玉琴危
絃奏苦調清歌抗哀音絃絕歌復咽起作薄命吟妾如
朱槿花含英愁晏陰郎如青銅鏡照面不照心不怨不
照心但惜飛光沈且留連理枕莫捲合歡衾儻君回餘
輝歡盟尚可尋

對酒不能飲撫劍自度曲一唱行路難歌與淚相續朝
為楊朱泣暮作阮籍哭古道盡荊棘新蹊苦蕢菜曲行

違吾心直行傷我足曲直無適從昂頭羨鴻鵠

綿綿兔絲草濯濯檉樹枝結根偶相值引蔓纏綿之春
風一披拂柯葉含榮滋弱質附美蔭百齡誓不違清商
忽用事霜飈颯已淒豈意百尺條同此寸草萎委蔓失
所託憔悴徒傷悲知君無歲寒何用相因依

賢王悲墜屨賢婦念遺簪重在不忘故微物何所欽嗟
我昔遊友雲路揚徽音詎念宿昔好棄擲各飛沈昔如
膠投漆今如辰與參桃李雖成蹊諒無松柏心

王亳州賓

三首

賓字德卿亳社人貞祐二年進士由虹縣令入
為尚書省令史壬辰京城受圍亳州為單父軍
楊春所據春以事出德卿與故譙縣尉王進反
正朝廷授進集慶軍節度使德卿同知使事明
年夏六月車駕幸蔡道出於亳德卿逆謁上與
語慰勞者久之詔行六部尚書事仍賜世爵後
數日部曲崔七輩以軍食不給送款執德卿與

副使呂鈞往市中鈞且行且拜泣涕不休德卿
毅然無所屈大呼曰但殺但殺不能從汝也是
日遇害德卿學詩甚力故所得亦多如風生傳
令箭星落受降城烟外暮鐘催倦馬林間殘照
聚歸鴉倉小軍爭米邨荒虎食牛又贈剛上人
云楞嚴讀罷爐烟冷澹坐山堂閱世人言懷云
功名不到書生手坐撫吳鈞惜壯圖題馬丘寺
壁云落葉擁窓僧入靜孤燈穿屋客吟秋人甚

稱之

補歸潛志王賓德卿亳州人擢第為虹令有聲
入為省掾坐事罷遭亂還鄉會兵變賓起率衆
據城後屬金朝已而見殺為人談諧輕脫嗜酒
無威儀詩頗工有上先子云致君有道莫如律
敢諫不行猶得名

衛真道中

毳袍落托又西征陌上東風小雪晴草色喚回原燎黑

冰漸消入水痕清年華荏苒心情減邊事倉皇夢寐驚
早晚渦南傳吉語一犁烟雨趣春耕

舟中

河伯夸秋漲舟人健晚涼艣聲搖落月山氣鬱蒼蒼

除夜

落托功名挽不前圍爐兀坐夜蕭然臘殘畫角東風裏
春到梅花小雪邊守得歲來慵攬鏡送將窮去自裝船
平明點檢人間事只有詩魔似去年

李夷

三首

夷字子遷後改名佻宛丘人苦於作詩賦古鏡
云盤盤古皇州夢斷繁華歇一鞭春事忙耕出
隴頭月土蝕背花昏蹄涔駭龍蹲鬚髯怒欲張
縮手不敢捫又云壽光閱人多曾有此客否欽
叔諸人甚愛之

補歸潛志李夷子遷後名佻字秀武陳郡人出
於兵家能刻苦為學喜讀史書究古今成敗治

亂尤喜武事習兵法擊劍馳射有志於功名累
舉詞賦不中改試經義復不售後將棄二科以
武舉進身無何城陷死年四十二子遷為人介
特自守不羣然尚氣使酒剛甚平居循謹惟恐
傷人既醉雖王公大人嫚罵不恤為文尚奇澁
喜唐人作詩尤勁壯多奇語然不為鄉里所知
貞祐末先子為陳幕一見喜之為延譽諸公間
後為麻知幾雷希顏所重東方後進皆推以為魁

若侯季書王飛伯杜仲梁曹通甫輩皆以兄事
與余最深子遷既死余嘗為哀詞道其為人之
詳平生詩不甚多不如意輒毀去嘗賦古鏡諸
公稱之其詩曰盤盤古皇州夢斷繁華歇一鞭
春事忙耕出壠頭月土蝕背花昏蹄涔駭龍蹲
鬚髯怒欲張縮手不敢捫星環紫極位篆列清
用文其篆文云
為清日用細看十三字墓誌冥漠君壽堂
鐫菱花何曾見朝霞榛烟夕霏時幾點拂雙鵝

神物污難久一日落吾手壽光閱人多曾有此
客不呵呵吾戲云雅志踵先民鏡裏春風面泉
下今日塵九原不可作哲弟師有若摩挲一面
銅便有親炙樂又弔張伯玉云匣內青蛇亦悲
吼竟憑誰識扶雲材

贈國醫張子和

禁藥喧喧以字行竈工往往笑狂生天將藉手開金匱
雲本無心到玉京歌嘯動成千日醉留連翻厭五侯鯖

祝君莫觸曹瞞怒世上青黏要指名

古劍

古樹崖摧陰雨天忽驚神物茁蒲然蛇吞元氣蟄千載
龍逐奔霆脫九泉虺首未歸豪馘裏缺歌聊發慨彈邊
物猶屢出為時用撫匣潸然惜壯年

書淵明傳後

南渡龍孫角禿顛不甘橫斃寄奴弦一襟義氣麾周粟
滿簡清風削宋年雪徑低徊松落落霜離健羨菊鮮鮮

時屯謚輩輕顏節顏厚吾家草木賢

郭邦彥

六首

邦彥字平叔本鄆縣人僑居陽翟遂占籍焉興
定五年進士調永城簿以退讓見稱生世不幸
處於頑嚚傲三者之間鬱鬱不自聊年未四十
而死寄庵先生愛其詩甚嗟惜之

秋夜聞彈箏篴

露重花香飄不遠風微梧葉落無聲倡樓何處教新曲

夜靜月高弦索鳴

村行三首

棗花初落路塵香
燕掠麻池乍颯颯
一片雲陰遮十頃
賣瓜棚下午風涼

芹葉蘆花岸兩邊
釣溪石畔落孤鶩
小畦引入平流水
麻稈森森已拍肩

豆葉芄芄麻葉光
植禾得雨又催黃
田家樂事誰真得
牧子行歌醉叟狂

酒醒

少年驕氣總消磨萬事紛紜夢裏過三載自持葷食戒
一心還被性宗魔凌烟閣上榮名好聚窟洲邊樂事多
今日酒酣都忘却亂吟俳語作狂歌

讀毛詩

含氣有喜怒觸物無不鳴天機泄鳥迹文字從此生誰
言土葦器聲合天地清樸壤犧氏瑟巧露媧皇笙末流
不可障聲律隨合并徧讀蕭氏選不見真性情怨刺雜

譏罵名曰離騷經頌美獻諂諛是謂之果銘詩道初不
然自是時代更秦火燒不死此物如有靈至今三百篇
殷殷金石聲漢儒各名家辯口劇分爭康成獨麾戈諸
儒約連衡祭酒最後出千古老成精我欲讀爾雅不辨
螯蟹名尚憐沈謝輩滿篋月露形孔徒凡幾人入室無
長卿三子論性命舉世為譏評白首草太玄才得覆瓿
罍不如匡鼎說愈笑人愈聽

御訂全金詩增補中州集卷三十四

欽定四庫全書

御訂全金詩增補中州集卷三十五

史學 八首

學字學優延安人兄才字才長住太學有聲學
優正大中省試第一人釋褐舞陽簿辟盧氏令
卒官妻李氏國初河南尹成之孫女小詩殊有
思致學優嘗客京師有所眷久而不歸李作詩
寄之云百年風樹底垂淚到君前學優得詩即

日命駕

補歸潛志史學學優延安人昆弟三人兄才長
亦知名學優之學長於史傳地理工詩絕句殊
妙年五十擢南省魁後中廷試得主武陽簿頗
有政聲再倅盧氏令病卒興定末與余同試於
廷始識之中夜棘圍談至旦後先子令葉學優
復來游先子歿學優寄挽詩未幾亦下世有詩
數百首

陪陳彥文謁筠泉榮上人

強隨禪客到西禪
竹柏團青蔭石泉
一首小詩吟不就
閒情元在落花邊

宮詞

寶帶香繡水府仙
黃旂彩扇九龍船
薰風十里瑤華島
一派歌聲唱采蓮

默翁溪山橫幅

默翁龐都運
才卿自號

五雲雛鳳下遼天
來作金鸞翰墨仙
詩酒償殘鶯館債

簡書薰破鹿門禪自憐歲月塵中老盡攬溪山筆底傳
短草疎林秋一幅典刑人物記當年

李道人崧陽歸隱圖

石壁城頭夜斬關軟紅塵底曉催班道人一笑那知許
門外清溪屋上山

晚梅

孤根春半恰春回剛逐天桃艷杏開蝶子蜂兒應有語
東風元不為渠來

七夕

箱牛迴馭錦機閒
天上悲歡亦夢間
月下並肩人不見
蕭蕭風葉滿驪山

醉後

觀魚暫覺心差樂
化蝶元來夢亦忙
得似醉中都放下
春風自與百花香

過太室

三輔祥開表聖期
三呼天壽與天齊
殿栖碧瓦仍唐制

洞鎖蒼苔失漢題玉柱已聞安廟祐劍鋒重為剪撐黎
升中刺有辭臣賦滿望鸞旂鳳蓋西

玉柱卓劍
二峰名

附續夷堅志河中李欽叔初生其父之才作湯
餅局有相者為史學優言君後當擢第但當出
此兒子門下為太晚耳學優雅以才名自負不
以相者之言為然其後欽叔二十三省元賜第
中廷試策宏詞科除應奉翰林文字兩預主貢
學優竟出其門云

侯冊
五首

冊字君澤以門資仕與杜仲梁張仲經劉京叔
游用是得名嘗作樂府云玉堦春草傷心碧錦
瑟華年過眼空又云千金買斷青樓月爛醉桃
花扇影風人多愛之壬辰歲病京師園中作詞
云回首鳳凰城下路人不見月茫茫明日君澤
死其後京城亦丘墟矣

補歸潛志侯冊季書先字君澤中山人不喜學

關鷄走狗雄鄉里南渡後慨然有為學心與一時名士游盡絕少年事喜作詩刻苦自喜自漢魏六朝唐宋人諸集無不研究初為李子遷所知薦於余先子亦喜之王飛伯負其材素少許可一見季書詩即加敬為人任俠尚氣然修謹無過失與余交最深久居南頓家甚貧遇朋友傾所有共樂天興改元陳亂失妻獨走大梁詣余會疾作數月死諸朋友為買棺葬西城余為

誌其墓刻石平生詩甚多同王飛伯唱和南頓
同余唱和梁園又喜效西崑體甚有得其弔一
貴人云歌翻薤露芻靈遠門掩秋風甲第深又
云峰前雨送閨中夢樓上雲凝扇底歌又明月
花樓閒玉鳳秋風桂漏戛銅龍又九疑湘瑟悲
龍竹子夜秦簫引鳳樓又幽鳥弄音花覆地斷
虹沉影水明河又詠雨云勢侵書帙絳芸潤聲
入簾旌蠟炬清又和飛伯云世事催人南去早

夢魂失路北歸遲置之唐人集中誰復疑其非也

寒食

時年十八

交游零落葉辭柯歲月崢嶸馬注坡燕子不來寒食過
滿城風雨落紅多

醉中

爛醉歸來驢失脚破靴指天冠倒卓起來白眼望青天
狂氣崢嶸無處著陶潛止酒意有在舖糟啜醕良未害

君看謝奕對桓溫得失老兵何足怪
螟蛉螺贏待二豪
飲中寧有山家濤平明徑訪陳驚座
相對春風把蟹螯

學古體

桐風吹月烏啼井蟾波濕露沈雲影素絲牽玉轉泉華
美人睡覺燕支冷銀鈎挂簾北窓曉翠鬟臨鏡雙鸞小
黃衫少年望不來寂寂庭堦滿春草

昨朝

昨朝已作春歸辭今日還成送客詩
客子春光俱不見

落花寂寂閉門時

楚宮

離宮樓閣與天通
暮雨朝雲入夢中
回首舊時歌舞地
女蘿山鬼泣秋風

王元粹

三十三首

元粹字子正初名元亮後止名粹平州人系出
遼世衣冠家年十八九作詩便有高趣性習專
固世事不以累其業故時輩無能當之者正大

末用門資叙為南陽酒官遭亂流寓襄陽襄陽
破隻身北歸寄食燕中遂為黃冠師有十月風
霜侵病骨數家針線補殘衣之句親舊有憐其
孤苦欲為之更娶者子正業已高舉主太極道
院竟不能自返年四十餘癸卯九月病卒詩人
淄川楊叔能挽之云匹婦主中饋雖貧生理存
五言造平淡隻影卧黃昏漫下陳著榻虛沾文
舉罇北平家世絕銜恨入荒原從弟鬱亦攻詩

方之其兄蓋商周矣

春日

時年十八

春日何慘慘春雲何陰陰桃李都未花況乃餘寒侵久
在 cities 居而無人見尋讀易了一編靜見天地心貧士
寡徒侶古來非獨今

臨高

客子臨高秋思生碧山無際暮雲橫但看八月草木落
未見中原塵望清流景暗徂人易老故園何在夢頻驚

罇中有物同誰盡正要相看醉膽傾

葉縣贈李長源

相見各異縣歲暮風霜清三日同眠食深見故人情藉
問何所歷大梁與秦京悠悠川途永冉冉歲月傾子當
東北馳予亦西南征人事相羈束何時當合并聊斟昆
陽酒為澆胸次平出處固難必勉哉崇令名

送李文起令郟城

好去郟城宰當途有薦章長才試縣邑嘉政寄循良遠

路連秋草征衫帶夕陽濟時公等在吾欲汎滄浪

九日

憑高一望客心傷風景蕭條是楚鄉飛鴈欲歸何處去
幽花還似昔年芳詩因感物聊成詠酒為隨人強舉觴
十載蹉跎身事晚每逢佳節轉淒涼

壽李長源

匹馬短衣看此行看君誰信是書生聽詩未覺秦川遠
倚劍長懷晉水清一飯見哀韓信恥千金為壽魯連輕

壯年休灑新亭淚且為江山灌巨觥

旅次

旅次渾無定生涯亦漫勞病求方士藥寒憶故人袍避俗惟黃卷忘憂但濁醪柴門多落葉昨夜朔風高

西山避亂三首

蒼山多回互四望令人迷過午日已暖殘雪融為泥路滑不可進弱葛愁攀躋老幼委溝壑不如犬與雞嗷嗷同行子手中各有攜汲澗為飲食架木為巖栖夜半三四

驚翁媪禁兒啼念我長病母亂離隔東西

野宿不得曉飛霜沾敝袍空山凝寒色天邊星月高憶
昨離郢城數家同遁逃穿林恐相失前後聞呼號避亂
但欲遠焉知登頓勞俯臨萬仞壑性命輕鴻毛

青青道邊麥知是誰家田山田固已薄榛石復相連旁
有破茅屋日入不見烟藉問舊居者聞亂已西遷平生
苦淪薄對此增慨然甲兵暗宇宙誰能安一廛愁憂無
從訴仰面視蒼天伐木南澗底雙鹿過我前

還鄂城舊居

四月六日作

南風兵塵遠病客返舊居入門顧四壁書籍亦無餘數
口共嗷嗷日事將何如屋破未暇葺草滿須當鋤昔去
季冬末今來孟夏初深媿資用絕時時煩里閭

經廢宅

誰家住宅北山隈亂後逋人尚未回惆悵門前是官道
臨風一樹杏花開

登鄂城寺樓

亂後行藏豈自由此身雖在病兼憂一抔徒積黃泉恨
四壁難為白日謀數極乾坤見中否跡隨丘壑恐長休
可憐海內干戈滿獨對江山倚寺樓

八月二十三日夜走西山

婦病不能進兒啼不肯行蒼茫荒野外北風鼓輦聲老
幼夜中逃失路入榛荆月出天欲曙山頭烽火明鄧卒
一戰潰敵勢遂縱橫昨朝使帖下主將亦還營嗷嗷二
十載何時見昇平我生值世亂世亂難為生

哭李長源

十月西來始哭君，山中何處有孤墳？
以才見殺人皆惜，忤物能全我未聞。
李白歌詩堪應詔，陳琳草檄偶從軍。
窮途無地酬知己，曾待昇平輯舊文。

襄陽七絕句

江雨初晴江漲發，涼風吹水波浪開。
日暮津頭聞打鼓，越商已賈卸船來。

街頭魚米近頗貴，縮項長腰最可珍。
江東蓴鱸亦何好，

能令張翰稱達人

近值喪亂棄中原南來亦復著南冠
吾家舊井峴山畔野老漫作北人看

襄陽城府自古雄千甍萬瓦當晴空
短衣少年何處客相邀一醉楚樓中

城東大堤堤上頭何處女郎同出遊
紫蓋留連不歸去唱歌日暮傍汀洲

江上小兒誇善沒一日入水知幾回
汝曹未有機心在

緣底鷗鳥不飛來

歎息耆舊不復見
欲問土風誰為陳
羊公遺碑武侯廟
江邊酒家說向人

武侯廟

武侯祠廟南山曲
苔滿荒碑不堪讀
客子登臨又一時
秋色蒼蒼入喬木
天下不可無奇材
千年精爽安在哉
孤吟徘徊不忍去
寒日欲下悲風來

萬里

萬里江山動楚吟，異鄉風物長年心。
孤身轉覺乾坤窄，往事空驚歲月深。
木落高城初過鴈，霜飛幽館夜聞砧。
蹉跎未遂東遊計，醉後悲歌淚滿襟。

醉後

雲自無依鶴自孤，此生誰信有窮途。
干戈二十年來客，留得殘骸傍酒壚。

丹陽

仙人樓居避蒸濕，東樓縹緲羣仙集。
風吹高柏影在衣，

忽驚滿座蛟龍入日晚留連共一觴歸來如夢海生桑
片雲送雨山頭黑傍水低飛燕子忙

東樓雨中七詩

水邊人去燕爭泥風動綠荷香滿溪高樹遶樓遮望眼
獨看山色過牆西

倚樓人看水東流橋上行人却望樓零落故宮無覓處
蕭蕭禾黍滿城秋

多年蒼柏拂簷枝燕子飛來語向誰枕簟不妨留客住

滿樓風雨下簾時

雨入溪樓不見山
雨晴依舊數峰閒
韋郎詩句王維畫
好在幽人指顧間

庭中野蔓走青蛇
窓外萱葵亂彩霞
雲漏斜陽雷漸遠
東邊飛雨到瓊華

好風吹袖覺涼生
雨後東溪水面平
無數荷蓮看正好
却嫌波底亂蛙鳴

溝水清冷樹影圓
下樓閒步上樓眠
夜來夢裏驚風雨

元是松聲到枕邊

附甘水仙源錄恕齋先生姓王氏名粹字子正
北平之巨族也才高而學贍少有詩名每一詠
出膾炙人口然與世疎濶不事舉業正大間薄
游鄧下漂泊江漢間甲午還至燕過真常大宗
師即北面事之執弟子禮居長春宮之萃玄堂
年四十餘以癸卯九月無疾而逝不決旬而見
夢於誠明張君其云為歎曲不異平昔少焉作

詩而別云當時每恨花開早及看花開花已老
花落花開能幾何回頭又見春光好詰旦誠明
書見夢之詩白於真常真常嘆曰子正仙矣聞
者異之先生為人性恬澹無機構廉潔貞介與
人交悉待之以誠聞有道行者雖窮居陋巷必
親之嗜讀書作文尤長於詩其古詩雖淡有陶
韋之風焉

邢內翰具瞻

一首

具瞻字巖夫遼西人天會二年進士與吳蔡為
文章友仕至翰林待制

出塞

樓外青山半夕陽寒鴉翻墨點林霜平沙細草三千里
一笛西風人斷腸

王太常繪

一首

繪字質夫濟南人天會二年進士武陟道中詩
云梧葉重勝迎日露萋秧薄要護霜雲人頗稱

之仕至太常卿有注太白詩行於世

江天秋晚圖

萬頃波間踏浪兒
瀟湘秋晚起歸時
四山紅葉風聲健
散入儂家欸乃詞

杜佺一首

佺字真卿武功人
宋末有詩名於闕中
兒時嘗作藥名詩
有杜仲吾家好弟兄
自然同姓又同名
之句及以五言百韻
上乾州通判馬涓涓大

加賞異阜昌中登科蒞官亦有聲馬嵬太真墓
過客多題其詩甚多道陵詔錄其詩得五百餘
首付詞臣第之真卿詩在高等舊有錦溪集亂
後不復見矣子師楊亦能詩尤工書翰奉天楊
煥然云然

馬嵬道中

垂柳陰陰水拍堤春晴茅屋燕爭泥海棠正好東風惡
狼藉殘紅送馬蹄

邊轉運元勳 二首

元勳字輔臣豐州人後遷雲中祖貫道遼日狀
元輔臣天會十年進士終於河間路轉運使其
弟元鼎元恕

望瀛臺春望

晴雲如困柳如癡丹杏開殘碧草齊一派望瀛臺下水
煖風遲日浴鳬鷺

高樓人散酒罇空漫擬新文送五窮獨倚南窓夜岑寂

一鈎涼月下疎桐

李寧州之翰

四首

之翰字周卿濟南人宣和末擢第人有勸參童
貫可以徑至官職者周卿謝絕之國兵破洺州
縛見元帥誘之使降語及君臣之際辭情慷慨
自分一死帥憐之遂被錄用後守寧州陷田侍
郎珪黨籍除名徙上京遇赦復官終於東平倅
有漆園集行於世子靈石尉謙孫德元今在鄉

里

書呈仲孚

造物固難量誰能計寒餓失馬乃為福夢牛翻作禍長
溪霜練靜修嶺蒼龍卧魂夢吾已安不勞歌楚些

題密雲州學壁

崎嶇到此興何堪況復風謠意未諳旅舍蕭條空自遣
胸懷磊落向誰談留連暮雨侵疎牖宛轉飛雲埽翠嵐
因憶林泉歸去好一燈幽夢遶春潭

中京遇因長老

天涯流落偶生還
古刹相逢語夜闌
歎我歸途千里遠
喜君禪榻一身安
松聲不斷風吟細
月影無邊露氣寒
分手山堂更寥索
冷雲衰草伴征鞍

歲暮

休怪年來白髮新
天涯三載困埃塵
偶離沙磧窮陰地
收得桑榆老病身
對雪莫吟秦嶺句
潑醅且醉漢江春
此生自斷無餘事
何必區區問大鈞

三興居士

一首

三興居士阜昌中人

題平陰僧寺

三吳家近水晶宮
行坐紅香綠影中
今日異鄉僧寺裏
一盆荷葉戰西風

楊興宗

一首

興宗高陵人宋既渡江故興宗有龍南集予同
舍郎楊君羨嘗見之

出劍門

嘔啞鳴鴈下長川萬疊青峰只眼前山鷗啄殘紅杏粉
杜鵑啼破綠楊烟夢迴蜀棧雲千片醉枕巴江月一船
物色誰分杜陵老風騷牢落劍南天

趙亮功

一首

亮功華州人嘗監富平酒

甘露寺

鄭南峰下寺泉石間疎篁飛雨度山閣閒雲生野塘簷

前松子落厨際柏烟香別後聞鐘磬山陰空夕陽

賈泳 一首

泳字漢甫洛陽人

題安生僧寺

天會己酉余嘗與王化原李端中同過是寺屬兵厄
甫罹堂宇頽敝繪素剝落秋草野蔓羅生堦上盤桓
終日間閤其無聞時風塵未靜竊謂此地當日就丘
墟及今與端中復來則寺有僧簡師矣向之所見頽

者已完葺剝者復嚴潔鐘閣巍焉石塔巋焉庭樹鬱
焉皆向之所未有者也因一讀舊題已經五稔自念
五年之間所向齟齬十步九蹶卒陷機穽豈非禍患
之來有積漸歟抑得失行止非人所能為歟嗚呼事
去如夢人生如寄窮達相推雖賢智有不能免焉者
顧余何足道哉所不知者他日過此寺之興廢余之
得喪悲歡又何如也續題一詩貽失路者共為一歎
云癸丑七月八日題

重來已是五年游
憂患相仍欲白頭
翻羨亭亭兩奇樹
不知風雨過春秋



御訂全金詩增補中州集卷三十五

欽定四庫全書

集部

御訂全金詩增補中州集卷三十六
七

詳校官中書臣張虎拜

主事銜臣徐以坤覆勘

總校官編修臣王燕緒

校對官編修臣勵守謙

謄錄監生臣黃嘉績

欽定四庫全書

御訂全金詩增補中州集卷三十六

王鬱

一十二首

鬱字飛伯少日作樂府擬古別離有黃鶴樓高
雲不飛鸚鵡洲寒星已曙之句人多傳之其後
入京師大為李欽叔所稱與之詩云詩句婉國
風下者猶楚辭贈詩者甚多有云憶昔潁亭見
飛伯恍若夢中逢李白又云紫陁仙人今淵雲

騎風御氣七尺身又云良金元有價白璧況無瑕又云王郎少年詩境新氣象慘澹含古春筆頭仙語復鬼語只有溫李無他人飛伯用是頗自貴重云

補歸潛志王鬱飛伯奇士也少余一歲與余交最深儀狀魁奇目光如鵠步武翩然相者云病鶴狀貌也少居釣臺閉門讀書不接人事數載為文閎肆奇古動輒數千百言法柳柳州歌詩

飄逸有太白氣象初為御史程公震所知繼為
李翰林欽叔麻徵君知幾史盧氏學優嘉賞且
共為延譽藉藉正大初余先子令葉飛伯持諸
公書來投先子異其文置門下遂與余定交每
觴酒讌遊無不在已而入南京見趙雷諸公皆
稱之不已布衣少年名動京師後因下第西遊
洛中余居淮陽凡三過留輒數月唱酬談論相
高每相別輒以所著相寄且相商訂為益正大

末南京被圍復相守圍城中天興改元秋飛伯
忽過余別曰吾跼伏陷穽不自得今將突圍遠
舉然生死未可知因出其所作王子小傳屬余
曰茲不朽之託也余不能止之而去三年不知
存亡丙申歲南遊交游輩說飛伯初為東諸侯
兵士所得其將厚遇之飛伯徑行不設機久之
為其下所忌見殺臨終懷中出書曰是吾平生
著述可傳付中州士大夫王飛伯死矣計其時

年甫三十餘哭諸鎮陽蓋飛伯為人雖聰穎絕
人然涉世日淺頗傲岸不通俗此所以不免余
嘗見其舉止言談無顧忌旁為懼然而飛伯益
自信莫能戒以是常得謗議為俗人所憎迄今
談其名不悅者多矣嗟乎以斯人之才氣稍有
鍛鍊其文章所至豈易量哉今而中道摧折不
迄於大成可以為斯文嘆其詩文往來與余最
多有淮陽唱和南頓聯句古賦銘贊書序數十

首遭亂皆在余橐中今仍畧載其小傳云先生
名青雄一名爵大興府人也十五代祖珪相唐
太宗官侍中永寧郡公曾祖衍金紫光祿大夫
定海軍節度使兼萊州管内觀察使祖彥信邠
州宜祿尉父欽山東路轉運司鹽鐵判官先生
始生之月父夢神人自天而下開所負紫絲囊
賜一大鵬且云吾後必來取其鵬在地振羽一
鳴驚而寤訪諸日者繇曰凜凜霜鶚賜上穹既

文於外又剛於中法生貴子其應在公他日必
作青雲之雄先生既生因採其語為名字年十
八父歿家素富貲累千金遭亂蕩散無幾先生
殊不以為意發憤讀書是時學者惟事科舉時
文先生為文一掃積弊專法古人最早為麻徵
君九疇所賞其後潛心述作未嘗輕求人知李
欽叔過釣臺得其所著傷魯麟導懷等賦并楊
孝童碑王夢祥哀辭大驚騰書徧薦於諸公先

生之名始滿天下自此去釣臺放游四方又移
隱陘山覃思古學正大五年先生年二十五矣
來游京師諸公倒屣爭識其面宰相聞其名取
所作文章將薦之事中格樗軒閒閒朝廷二大
老皆致禮於先生交館之明年以兩科舉進士
不中西游洛陽放懷詩酒盡山水之歡先生平
生好議論尚氣自以為儒中俠所向敢為不以
毀譽易心又自能斷大事其論學孔氏能兼佛

老佛老為世害然有從孔氏之心學者徒能言而不能行縱欲行之又皆執於一隅不能周徧故常欲著書推明孔氏之心學又別言之行之二者之不同以去學者之弊其論經學以為宋儒見解最高雖皆笑東漢之傳注今人唯知蹈襲前人不敢誰何使天然之智識不具而經世實用不宏視東漢傳注尤為甚亦欲著書專與宋儒商訂其論為文以為近代文章為習俗所

蠢不能遽洗其陋非有絕世之人奮然以古作者自任不能倡起斯文故嘗欲為文取韓柳之辭程張之理合而為一方盡天下之妙其論詩以為世人皆知作詩而未嘗知有學詩者故其詩皆不足觀詩學當自三百篇始其次離騷漢魏六朝唐人餘皆置之不論蓋以尖慢浮雜無復古體故先生之詩必求盡古人之所長削去後人之所短其論詩之詳皆成書其論出處以

為仕宦本求得志行其所知以濟斯民其或進
而不能行不若居高養豪行樂自適不為世網
所羈頗以李白為則先生受知最深者曰樗軒
公完顏璫閒閒公趙秉文余先子雷希顏李獻能
王若虛麻九疇史學優程震宋九嘉其游從最
久者曰李汾楊弘道元好問魏璫張邦直杜仁
傑曹居一雷琯冀禹錫張介王說王采苓趙著
張甫王鑄劉輯李全劉源楊奐胡權圖克坦公履

呂鯤史環李佺侯策張傑劉郁左垣牛汝霖僧
性英諸公隨得書無次第至於心交者惟李治
劉祁二人而已八年先生復至京師十二月遇
兵難京城被圍先生上書言事不報明年四月
圍稍解五月先生挺身獨出遠隱名山不知所
終

春日行

春日飛春野寂紅朋碧友元胎濕東風著意寒食時遊

絲粘人困無力小鈴犢車譙堤沙鳳簫驚落瓊英花荒
墳頽頽啼夕鴉草荒月黑鬼思家

寄遠吟

一封征人書秋帆瀟湘岸當君高樓醉憶妾空閨嘆

陽關曲

城東車馬已促裝城西江水青茫茫綠楊陌上一杯酒
離愁慘淡春無光秦樓花映晴煙直誰家少婦當門立
金鞭入手紫燕嘶回首飛雲晚山碧

傷別曲

蘭皋飛暗塵征車紆去轍長安雖咫尺回首繁華歇故
人亭下酒蛾眉眼中血平生慷慨腸忽作柔絲結傳聞
紫塞傍秋烽映危堞班超未投筆來瑱空嚼鐵誰能金
閨中生眷娟娟月

長安少年行

新月平康金步蓮青雲戚里玉連錢誰家年少秋風裏
梁甫吟成抱劍眠

楚妃怨

涼風遶樹秋長河絡天碧深宮悄無人月暗莎雞泣

古別離

山腰露蕙含天淚江林楓葉秋容醉夫君八月鴈門行
碎霜冷卻白龍轡憶君挑妾初鳴琴琴中已有白頭吟
朝朝暮暮當時事言之祇足傷人心君不見湘妃二女
哭舜時煙筠青玉紅珠滋蒼梧人去百想絕忍教今日
生離別生離別情偏重不及雙飛南浦雲落紅寂寂春

閨夢

秋夜長

秋風嫋嫋吹庭樹傷心一葉隨風去葉隨風去何所之
似我年年困羈旅神繆紆屈泥中蟠青雲未到誰汝憐
愁來不寐起視夜斗柄斜指西南天

折楊柳

長安二月多綠楊遠信未到龍庭旁佳人中夜抱影坐
風窓泠泠愁思長青天無雲一鏡潔萬戶千門音響絕

何人橫笛在高樓
玉龍叫徹春江月

遊子吟

短日空徘徊
流雲自來去
茫茫曉野客衣單
白露無聲落秋樹

陽翟贈李司戶國瑞

洛陽賞盡牡丹春
寂寞釣臺對夕曛
手折幽蘭贈行子
多情惟有李參軍

飲密國公諸子家

宣公坊裏榆林巷便是臨淄公子家寂寞畫堂豪貴少
時容詞客醉琵琶

附畿輔古蹟志釣魚臺在阜城門南十里花園
村古花園後為村今平疇矣金王鬱釣魚臺有
泉湧地出為玉淵池今人呼鬱臺更呼釣臺焉
且合而呼之曰釣魚臺

附金詩紀事按明一統志云釣魚臺在順天府
西花園村臺下有泉湧出匯為池其水至冬不

竭相傳金人王鬱隱此作臺池上假釣以為樂
又公鼎問次齋集云西郊有地名釣魚臺是金
主游幸處

王禮部競

一首

競字無競安陽人宋末登科仕國朝至禮部尚
書兼翰林學士承旨年六十四大定四年卒無
競善作大字字或廣長丈餘而結密如小楷京
都宮殿題榜皆其筆趙禮部以為古今第一手

唯党篆差可配耳一孫名道通字彥深今為黃
冠師

補金史王競為河內令沁水泛溢歲發民築隄
豪猾因緣為奸競覈實之減費幾半縣民為之
諺曰西山至河岸縣官兩人半蓋以前政韓希
甫與競相繼治縣皆有幹能絳州正平令張元
亦有治績而差不及故云然

附元好問王無競題名記安陽王尚書無競天

眷中以文章顯於吳蔡諸公間凡燕遼汴梁宮
殿題榜如大安大慶應天承天之類皆其筆也
興定中閒閒趙公為禮部下蔡州取顏魯公逍
遙樓額入京師予因問公無競大字何如逍遙
閒閒言字有真行大小之不一人鮮能兼之無
競他書未必便過前人至於尋丈大字盤之筆
勢如作小楷自當為古今第一殆天機所到非
學能也乙巳秋予與梁辨疑李輔之武伯佐游

崢山祠因得無競崢山神三字聞之伯佐南申
王氏國初以好客名河東朱少章姚仲純滕秀
穎趙光道宇文叔通皆游其門叔通後歷臺閣
高氏子姪名行中者不遠數千里走書幣求為
其父濟叔晦叔墓碣銘殆無競以叔通故為書
之耶不然邊鄙荒陋時無貴仕者何以至此哉
自明昌己後縣多名進士如劉洗馬子安樂少
尹仲容胥莘公和之張大興信之楊大叅叔玉

王監使正之皆嘗會於祠下何獨無一言及無
競此書使州里知之為希代之寶在吾河東祠
廟為第一手耶予恐多故之際神筆寶墨有意
外不測之變雖百悔不可及乃託好事者使刻
之石以傳不朽八月十有一日新興元某題記
奉使江左讀同官蕭顯之西湖行記因題其後
雲烟濃淡費臨摹行記看來即畫圖雲夢不妨吞八九
筆頭滴水了西湖

元日能一首

日能不知何許人與劉巖老同時

紅梅

天上瓊兒白玉肌吳妝畧約更相宜認桃辨杏由君眼

自有溪風山月知

巖老同賦云一點清香透雲雪是中
那得杏花天評者謂二詩同意而日

能為
工

范曄一首

曄字元涉系出潁川有詩話行於世

和高子初梅

春風也自惜流光只放寒梅一樹芳
玉粉更妝前夜雪口脂猶注昔年香
江湖昨夢誰同寄詩酒風流豈易忘
東閣何郎未全老花枝休笑鬢絲長

王雄州仲通

一首

仲通字達夫長慶人天會六年進士
皇統中陷田珏黨籍編配五國會赦還
世宗即位復官終於永定軍節度使

送客

措足疑無地捫心幸有天
故人成邂逅殘喘見哀憐
落日驚魂外孤雲淚眼邊
西歸萬里夢今夕到君船

附族帳部曲錄王仲通字達夫閬陽人又云中
京人狀元石琚榜及第宣時坐欺妄與田穀等
為黨錮貶為庶人葛王立復官除禮部郎中

韓內翰汝嘉

一首

汝嘉字公度宛平人父昉遼末狀元仕國朝至

宰相嘗作武元聖德神功碑為作者所稱公度
皇統二年進士累遷真定路轉運使坐公事遷
清州防禦使召為翰林侍讀學士卒

寄元真同年

十年塵土鬢毛斑杖屨還來踏故山
葉寄殘紅春尚在
雲酣溼翠雨仍慳不堪倚樹追前事
更恐臨溪見病顏
一日暫來千日去何時倦鳥得真還

王吏部啟

一首

啟字希畢大興人正隆二年進士累遷戶部員外郎通州刺史用宰相萬公薦權右司郎中章宗即位不一歲遷工部侍郎即以河南北路提刑使拜吏部尚書使宋使還出為絳陽軍節度使致仕還鄉里與左丞董公叅政馬公宣徽盧公尚書郭公為九老會年七十九卒子師楊字仲雄南渡後隱居崧山時年已六十餘經傳子史皆手自鈔之如健舉子結夏課然希顏說仲

雄在太學同舍號為閑戶王先生其謹厚蓋家
法云孫造字成叔今居東平

王右轄許送名酒久而不到以詩戲之

燕酒名高四海傳兵厨許送已經年青看竹葉應猶淺
紅比榴花恐更鮮枕上未消司馬渴車前空墮汝陽涎
不如便約開東閣一看長鯨吸百川

晁洗馬會

一首

會字公錫高平人道院文元公之後宣和末中

武舉仕為太子洗馬天眷二年經義進士為人
美風儀氣量宏博澤人經靖康之亂生徒解散
公錫稍誘進之貧不能就舉者必厚為津遣在
官下則分俸以給之至於李承旨致美昆仲亦
出其門士論歸焉歷虞鄉猗氏臨晉三縣令以
興平軍節度副使致仕年七十八終於家詩號
泣水集虞鄉縣齋云官況薄於重櫟酒瓜期近
似欲殘碁王官谷云煙藏芳樹遠雲補斷山齊

鄉人至今傳之孫國章字公憲李承旨外孫教
授鄉里樂於提誨諸生經指授者肅然如在官
府進退拱揖皆有可觀蓋其家法云

杜鵑

杜宇啼聲枕上來一聲哀似一聲哀千哀萬怨無今古
喚得行人若箇迴

王內翰遵古

二首

遵古字元仲父政金吾衛上將軍三子遵仁遵

義元仲其季也元仲四子庭玉字子溫內鄉令
終於同知遼州軍州事庭堅字子真有時名庭
筠字子端庭拱字子文

過太原贈高天益

天益能
作大字

遼海渺千里風塵今二毛心雖如筆正官不稱才高
筦庫非君事山林必我曹相期老鄉國拂石弄雲璈

野菊

關雉臺下秋風裏白白黃黃無數花日暮城南城北道

半隨榛棘上樵車

王汾州璿

二首

補一首

璿字君玉太原人天眷二年進士第珙器玉珣
汝玉皇統九年同榜家世業醫有陰德聞里中
嘗有金蠶金馬之瑞君玉仕至汾陽軍節度使
鄉人榮之號三桂王氏行尚書省左右司郎中
仲澤其從孫也金馬在部掾清卿房迄今寶之

游太寧寺

西山踏破萬層青與客攜壺上太寧
泉石有情容避俗軒裳無術可逃形
雲縈屋角僧禪靜露下松梢鶴夢醒
明日却尋塵境去曉猿啼月若為聽

王元仲海岳樓同諸公賦

王珣附

十二朱欄倚半空元龍高臥定誰雄
簷楹翠溼蓬山雨枕簟涼生弱水風
物色橫陳詩卷裏雲濤飛動酒杯中
謫仙會有騎鯨便八極神游路可通

謁狄武襄祠

傑士西河秀英雄挺偉姿奮身甘衛國弭節願匡時妙
畧風雲會威名草木知功高懾南服計重破西陲定亂
勞三箭平戎在一麾勢傾銅柱遠聲振玉關奇頗牧才
何濟孫吳譽并馳朝廷分重寄將相賴兼資豹畧多全
勝鷹揚屢捷師雍容敦禮樂談笑屈華夷褒錫酬車服
勲勞著鼎彝雲臺仰冠劍麟閣儼形儀錦里家猶在蘭
陵塚不隳風號墳上木苔漬廟前碑過客煩詩句鄉人
奉酒卮汾陽遺美蹟千古話芳規

李特進獻可 二首

獻可字仲和遼東人太師金源郡王石之子太
師遼末狀元仲和世宗元妃之弟大定十年史
紹魚榜進士歷州縣入翰苑累遷戶部員外郎
以事貶清水令召為大興少尹遷戶部侍郎終
於山東東西路提刑使衛紹王即位以仲和元
舅贈特進道國公子道安特旨符寶郎

清水寒食感懷

桃花零亂柳成陰人到春深思更深芳草成樓天不盡
異鄉寒食故鄉心

召還過故關山

過關天日正晴明誰道山神不世情遠客得歸心緒別
隴隴閒作斷腸聲

雷溪魏道明 二首

道明字元道易縣人父遼天慶中登科仕國朝
為兵部郎中子上達元真元化元道俱第進士

又皆有詩學元道最知名仕至安國軍節度使
暮年居雷溪自號雷溪子有鼎新詩話行於世
元道春興云燕來燕去烏衣巷花落花開穀雨
天高麗館偏涼亭云涼或作梁碧海半彎蝸角國春
風十里鴨頭波中秋云丹桂知經幾寒暑冰壺
別是一山川其所得者也

佛巖寺

虎谷西垠北口南橫橋過盡見松菴舊遊新夢猶能記

般若真如得便叅霜圓結蔬充早供石泉煮茗薦餘甘
殘年便擬依僧住過眼空花久已諳

退食

竿頭犢鼻清貧在夢裏槐安舊習空退食歸來澹無事

水邊長嘯看晴虹

學易雷思

一首 補二首

思字西仲渾源人天德三年進士大定中任大理
司直持法寬平至今稱之仕至同知北京轉

運使事有易解行於世第志字尚仲亦第進士
仕至永定軍節度使西仲季子淵最知名

食松子

千巖玉立盡長松半夜珠璣落雪風休道東游無所得
歲寒梁棟滿胸中

題王官谷天柱峯

一峯凝碧倚晴空一水縈紆一徑通中有幽人從說古

誰知高興與今同

一作劉昂

題藏雲洞

仙人含茹紫芝香
占得中條最上方
何事紅塵飛不到
幽居常被白雲藏

王大尹脩

一首

脩字脩然范陽人皇統二年進士資稟鯁峭甫
入仕即以材幹稱大定中皇子曹王尹大興脩
然為少尹王移鎮北門復以同尹從之前後多
所規益朝廷稱焉遷咸平轉運使改知潘州坐

為怨家所誣奪官宰相有為辦理者得鄭州防禦使章宗即位召拜禮部尚書以選為大興尹兩月政成發姦擊強剖繁理劇百年以來無有出其右者尋為護前者所排繫獄累月天子知其非罪出之脩然幅巾歸范陽明年起為定國軍節度使致仕卒遺命無請諡無立碑然至今言名臣者必及焉

烏子秀自左司員外郎左遷上京幕官

楚山白玉點蠅頭正坐胸中有九流同是吏郎皆五馬
不知山鬼解揶揄

高工部有鄰

一首

補三首

有鄰字德卿遂城人數歲入小學州將為子娶
婦驂御盈路同舍兒競觀之德卿讀書自若也
大定三年第進士歷州縣為尚書省令史時相
議詘詞賦專明經德卿以賦有諷諫之義反復
詰難竟得不罷爾後擢第者廷試時務策亦自

德卿發之明昌初累遷安國軍節度使父飛狐
令謀嘗尉南和以公事活千餘人德卿實生是
邑父老有身及當時事者扶杖迎勞歡呼馬前
德卿亦為立碑尉廳不踰月子嵩猶子鑄同榜
登科時人榮之泰和中使宋還拜工部尚書致
仕卒德卿孝友廉介長於吏事所至興學校敦
風化以儒雅自緣飾耆舊至今稱之子巖字士
瞻第進士季子幾字士美正大初監察御史最

知名

馬嵬

事去君王不奈何
荒墳三尺馬嵬坡
歸來枉為香囊泣
不道生靈淚更多

驪山

不見朝元閣
難尋羯鼓樓
繁華隨世去
唯有渭川流

溫泉

開元常侍太平年
楊李藏奸弄國權
試上驪山弔今古

興亡都不在溫泉

驪山高處舞霓裳都為平居厭未央惟有溫泉長似舊
任他行客感興亡

附畿輔古蹟志萬華堂在南和縣衙內金高謀
為南和尉下車初見蓮花滿地粲然而喜以為
異瑞因名其堂遂生有鄰及長嗜學登進士第
後官邢州來訪堂蹟鐫其事於石

宋孟州楫

二首

楫字濟川長干人年十九天德三年擢第除著作郎母老丐歸養許之泰和三年以省掾從吏部尚書梁肅使宋副趙王府長史直臣獵淮上射一虎斃之濟川有詩記其事語意俊拔泗州守刻石於鎮淮堂濟川官至孟州防禦使子元吉字祐之明昌二年進士元圭字達之泰和三年進士皆有名於時曾孫弘道今在武陟還紫雲寺素扇且題詩其上

吳綾便面小團團失手拈來亦厚顏障盡驛塵三十里
却還明月紫雲間

庭槐

庭槐先人手所植再世清陰方滿臺慚媿兒孫種桃李
花枝準擬當年開

御訂全金詩增補中州集卷三十六

欽定四庫全書

御訂全金詩增補中州集卷三十七

高轉運德裔

一首

德裔字曼卿野人高才博學弱冠擢第累遷
登聞檢院同知太府少監平陽少尹開州刺史
豐王傅卒於西京路轉運使工於為文字畫尤
有法所題卷軸今猶有存者嘗以樗軒所書比
之氣韻形似無毫髮少異樗軒物望甚高殊不

易學曼卿乃暗合之真異事也子元道殿中侍

御史

坐忘女

女環州張氏年十三異夢之後
坐忘已四年矣贈詩者甚多

結習銷來性自圓去留元不間人天消搖自是忘形蝶
枯寂寧同委蛻蟬無礙真空常蕩蕩若存餘息尚綿綿
立忘坐脫皆游戲定力何嘗有變遷

路冀州仲顯

一首

仲顯字伯達冀州人家世寒微其母有賢行教

伯達讀書國初賦學家有類書名節事者新出
價數十金大家兒有得之者輒私藏之母為伯
達買此書搏衣節食累年而後致戒伯達言此
書當置學舍中必使同業者皆得觀少有靳固
吾即焚之矣伯達正隆五年進士明昌初授武
安軍節度使鄉人榮之雲朔用兵奉使江左還
獻賜幣以佐軍未報而死章廟詔以所獻還其
家夫人傅氏曰此非吾夫意復上之有司不聽

夫人付之州學買上田二千畝有奇以贍生徒
故相馬琪德玉時判州事聞於朝賜號成德夫
人伯達二子鐸字宣叔鈞字和叔俱有名於時
宣叔為諫官諫章廟元妃李氏出細微不應上
僭有累聖德又其兄弟恃寵納賂將有楊國忠
之禍坐謫訕除名宣叔布衣還鄉里傳夫人臨
終教宣叔曰汝以憂國愛君故極言直諫天子
明聖特暫有所蔽計他日必復起汝前事須再

言勿有所顧藉也墓碑不之載故表出之

楊祕監釋迦出山像

自從此老出山隅
惱亂蒼生底事無
他日若逢楊處士
只教畫箇涅槃圖

張代州大節 一首

大節字信之五臺人
天眷中進士與興陵有藩
邸之舊愛其真淳甚倚重之
歷橫海軍節度使
咸平大興尹吏部尚書河東北路兵馬都總管

明昌初請老特授鴈門節鉞除其子巖叟忻州
刺史以榮其歸信之好獎進士類滄州徐彥大
原王澤大興呂造經其指授卒成大名士論以
風鑒歸之巖叟字夢弼亦第進士歷嵐潞懷三
州節度終於集慶軍屏山謂吏事不及乃父而
以長厚見稱子待舉臺掾選授奉御正大末從
車駕東狩不知所終孫紹祖在東平

同新進士呂子成輩宴集狀元樓

鸚鵡新班宴杏園不妨老鶴也乘軒龍津橋上黃金榜
三見門生是狀元

趙轉運慙

三首

慙字叔通黃山先生渢之父也宋末汪彥章任
鄆州教官叔通為學正嘗預酬唱故其詩文皆
有源委國初登科仕至同知南京路轉運使事
擬古

春風動地來依依燒痕青王孫行不歸離恨何時平翩

翻誰家兒曉獵開紅旌彫弓插白羽怒馬懸朱纓團合
意氣雄廝養厭庖烹人生一春草時至何足榮君看五
陵樹日暮悲風生

蜀山曉發

曉發蜀山道山深人自迷殘星數嶽小斜月一梳低隔
舍縹車響遙林杜宇啼區區事行役何日得安棲

寒齋雪中書呈許守

剪水作花開紛紛天上來聲清偏傍竹艷冷欲欺梅積

潤滋牟麥餘膏丐草萊窮欄休歎息數日是春回

郭祕監長倩

一首

長倩字曼卿文登人皇統丙寅經義乙科仕至
祕書少監兼禮部郎中修起居注與施朋望王
無競劉巖老劉無黨相友善所撰石決明傳為
時人所稱有崑崙集傳於世子天驥

義師院叢竹

南軒移植自西壇瘦玉亭亭十數竿得法未應輸老柏

植根兼得近幽蘭雖無穠艷包春色自許貞心老歲寒
百草千花盡零落請君來向此中看

郭錄事用中

一首

用中字仲正平陽人大定七年進士歷浮山簿
陝州錄事卒年三十一有寂照居士集郝子玉
毛牧達鄭仲康為之引其賦醋魚云身臥不知
雲子白氣酣聊作木奴酸按博物志西羌仲秋
日取鯉子不去鱗破腹以赤秫米飯鹽醋合糝

之逾月則熟謂之秋鮓故仲正云然又賦雪云
灞橋柳絮人千里楚澤蘆花水半扉殊有詩人
思致恨不假之以年耳

偶得

叅徧叢林嬾出游指端孤月照高秋大千界裏閒窺掌
不二門中暗點頭埽地燒香聊自遣栽花種竹儘風流
蒙莊抵死談齊物無物齊時也合休

趙太常之傑

三首

之傑字伯英大定人本名宗傑避諱改大定十六年進士歷西京提刑副使棣州防禦使終於太常卿使宋還言事云宋人文敝之極且脆弱不足為慮邊部為可慮也其前識如此子繪名進士早卒孫季卿在燕中

附楊奐跋趙太常擬試賦後金大定中君臣上下以淳德相尚學校自京師達於郡國專事經術教養故士大夫之學少華而多實明昌以後

朝野無事侈靡成風喜歌詩故士大夫之學多
華而少實上病其然也當泰和丙寅春二月二
十五日萬寧宮試貢士總兩科無慮千三百輩
上躬命賦題曰日合天統侍臣初甚難之而太
常卿北京趙公適充御前讀卷官獨以為不難
即日奏賦議乃定既而中選者纔二十有八人
僕時甫冠獲試廷下而席屋偶居前列朝隙聞
異香出殿櫺間一紫衣顧予起問題之難易及

名氏里貫年齒而去少顧復相慶曰適駕至矣
薄暮出宮傳以為希遇嘗退而志之後四十五
年僕以河南漕長告老於燕過太常之孫承祖
家得所擬賦感念存歿不能不惻然為叙其末
并以舊詩歸之所謂月淡長楊曉色清天題飛
下寂無聲南山霧豹文章在北海雲鵬羽翼成
玉檻玲瓏紅露重金爐縹緲翠烟輕誰言半夜
曾前席白日君王問賈生者是余少作也無可

取以其紀一時之事庶附趙氏家傳或見於後
世云

許道寧羣峯暮雪

道士平生林野人醉中拈出雪峯真為君療却烟霞癖
比似青囊藥更神

題濟源龍潭寺

樹圍修竹竹圍庵庵下泓然碧一潭極目荷花半秋色
小橫圖上看江南

除夜

日月不肯留歲歷修云畢僧房見節物新正在明日夜
半撫枕歎半百又加七形骸念念改膂力能不失經言
男數八此去才有一健者未可期況乃常衰疾物情忌
盈滿君子慎名實行矣安退閒吾其保終吉

趙轉運鼎

一首

鼎字德新欒城人大定十六年進士喜作詩頗
知道學屏山所許如此仕至西京路轉運使元

日詩云拜嗟筋力隨年改飲覺屠蘇到手遲惜
不多見也子中立字正卿第進士文譽甚著

宿來同堡

渭北洮南過却春窮邊冰雪更愁人來同驛裏題詩處
破屋青燈一病身

田轉運特秀

一首

特秀字彥實易縣人大定十九年進士仕至太
原轉運使喜作詩為周德卿李之純所賞感興

云散木不材寧適用虛舟無意任隨流百年身
世槐安國千古人情羹頡侯賦古塔云締構百
年人換世消沈千古烏盤空他類此彥實所居
里名半十行第五以五月五日生小字五兒二
十五歲鄉府省御四試俱中第五年五十五八
月十五日卒造物之戲人如此

五月五日生者
見其賦集序胡

國瑞
云

宿萬安寺

長途鞍馬倦黃塵喜見空巖萬疊雲漫漫野烟迷去鳥
蕭蕭林葉帶殘曛苔封老檜龍鱗起石礙流泉燕尾分
夜敞松窗耿無寐一庭蘿影月紛紛

趙漕副文昌

一首

文昌字當時陵川人仕至京兆轉運副使嘗有
詩云蟲聲連壞壁樹色入秋窗草香花落處山
黑雨來時頗為黃華所稱

歌扇

媚娘巧作貫珠喉畫扇團團半掩羞唱到春山小顰處
一輪明月為花愁

路轉運忱 一首

忱字子誠平郭人大定二十二年進士累遷監
察御史終於河東北路轉運副使

秋懷

落日留虛壁秋風急戍樓高歌鬼神夜揮涕虎狼秋豪
貴少青眼文章多白頭何時挂長劍天地一扁舟

高密州公振 一首

公振字特夫正隆初進士歷南京留幕終於密
州刺史詩有家學賦南園江鄉有翠蓋紅粧無
俗韻綠陰青子更多情之句惜不多見也

裴氏西園

簿領沈迷倦不禁偶從名勝此幽尋竹陰疎處見潭影
人語定時聞鳥音陳迹漫留千古恨歡遊聊慰十年心
多情一片梁園月送我垂鞭出上林

張轉運穀 一首

穀字伯英臨潁人大定二十八年進士仕至河
南路轉運使家多法書名畫古物祕玩周秦以
來鏡至百餘枚他物稱是天性孝友與人交極
誠款古所謂博雅君子者伯英可以當之弟穀
字伯玉美風儀善談論氣質豪爽在之純希顏
伯仲間舉進士有聲場屋及再上不中即拂衣
去嘗自言丈夫子娶非尚主官不徒步至宰相

不屑可也宰相李公仲修適之皆與之遊從不
敢以布衣諸生處之家既貴顯厚於奉養擊鮮
為具賓客日滿門窮晝竟夜卒以樂死嘗賦雪
云樵屐雙鳬懶漁蓑一蜩拳醉後云日日飲燕
市人人識張翳西山晚來好飲酒不下驢賦畫
石云腹非經笥口不肉食胸中止有磊磊落落
百千萬之怪石興來茹噎快一吐將軍便欲關
弓射氣母忽破碎物怪紛狼籍有時醉狂頭插

筆寫盡人間雪色壁其顛放如此

補歸潛志張運使穀字伯英許州人少擢第以
謹愿純厚著名嘗為監察御史言奸臣赫舍哩
執中事士論壯之後以母喪歸居許之西城有
園圃號小斜川花木泉石隱然一佳處公日在
其間行吟坐嘯客至一觴一詠盡歡襟韻翛然
君子儒也尋判隰州刺史召為戶部郎中同知
河南府遷平陽路轉運使卒公蒞官以廉俸祿

未嘗妄縻布衣蔬食泊如也性友愛弟穀才高
相與甚懽所蓄稱其所用獨好收古人器物所
在購求藏古鏡尤多其樣製不可徧識字畫勁
古有顏平原風詩學黃魯直格嘗贈余先子詩
云丘垤孰與南山尊公卿皆出山翁門遺文人
共師夫子陰德天教有是孫問禮庭中新有桂
忘憂堂下舊多萱人間樂事君兼有歌我新詩
侑壽樽此斜川時事也赴隰州被召時又寄詩

有句云溪口急流裁燕尾山腰世路轉羊腸到
郡蒞官才九日過家上塚正垂楊

石淙

天后離宮在崧山曲河即東坡為韓子華賦詩處也

潁水洗餘高士耳是非猶恐污人牛區區武媚何為者
水上摩崖紀宴游

宗御史端修

一首

端修字平叔一字伯正汝州人大定二十二年
進士衛紹王避世宗諱改宗為姬而天下止以

宗平叔目之好學喜名節操履端勁慕司馬溫
公之為人自為諸生時見者必悚然敬之明昌
中自省掾拜監察御史車駕東狩是歲大寒人
有凍死者平叔諫止之元妃兄弟李喜兒輩干
預朝政平叔上書以遠小人為言道陵知其為
喜兒發詔喜兒就問卿欲朕遠小人小人為誰
其以姓名對平叔奏小人正李喜兒兄弟耳喜
兒以聞李氏兄弟皆被切責竟以訐直貶官平

叔自守愈篤是是非非議論一出於正大為朝廷所知降詔褒諭以全州節度副使卒官平叔妻死不更娶潔居二十年士論高之永寧游彥哲調汝州司候將之官問為政平叔言為政不難治心養氣而已彥哲不領明日復來云夏初入官且臨先生鄉郡請問從政而先生乃以治心養氣為言思之不能得願終教之平叔曰子寧不知此耶治心則心正心正則不私養氣則

氣平氣平則不暴不私不暴為政之術盡於此
矣平叔墓碑及傳閒閒公所作稱其剛稜疾惡
有鐵面陳了翁之風人不以為過云姪孫汝作正
大末保山棚有功入守汝州力盡城復陷兵人
欲降之不屈而死

漫書

冷面宜教冷眼看只慙索米向長安陰崖何限枯松樹
望見屏幃盡牡丹

附趙秉文舉道齋記余七歲知讀書十有七舉
進士二十有七與吾姬伯正父同登大定二十
五年進士第厥後余調安塞主簿遷邯鄲唐山
令是時年少氣銳急簿書稱賓客舞智以自私
攘名以自尊蓋無非為利之學而吾伯正父心
平氣和以撫循其下養孤兄弟之子如其所生
年四十餘喪其配遂不復娶若將終身焉及任
監察御史危言讜論瀕死而不顧是其果有大

過人者豈真有道者耶他日余問道於伯正父
伯正父曰余何知道余但日食二升米終歲製
一緇袍日旦入局了吾職不敢欺賓客慶弔之
外課子孫讀書而已余何知道在他人乃尋常
日用事而伯正父行之乃有超然不可及者非
有道者能之乎

張戶部翰

五首

翰字林卿秀容人大定二十八年進士為人有

蘊藉如素宦然累遷監察御史翰林直學士貞祐初戶部侍郎車駕南渡出為河平軍節度使召拜戶部尚書草創之際經費空竭雖米鹽細物皆倚之而辦予嘗見於戶曹邠州一書生言時事相與詰難凡數十條率不思而對雖反復計度者亦自不能到信通濟之良材也宣宗旦暮相之會卒年五十五弟脩字飛卿承安五年進士同知河東北路兵馬都總管事猶子天彝

字仲常黃裳榜登科子天任字西美近侍局副
使死於宋州之變

贈石德固

西湖之月清無塵橘中之樂猶避秦向來所見止此耳
渠亦豈是真知津如君眼孔如許大萬事付之塵甑墮
兒能詩書又肯播著脚世間看踏破青巾玉帶桃李花
日斜空望紫雲車布衣誰識隱君子一馬隤然何處家

再過回公寺

山州風土極邊頭二十年中復此游青鬢已隨人事改
碧溪猶繞寺門流輕寒剪剪侵馳褐小雪霏霏入蜃樓
為問勞生幾時了不成長抱異鄉愁

萬寧宮朝回

宿雨初收變曉涼宮槐恰得幾花黃鵲傳喜語留鞞尾
泉打空山輒鞠場已覺雲林非俗境更從衣袖得天香
太平朝野歡娛在不到蓮塘有底忙

奉使高麗過平州館

昨日龍泉已自奇
一峰寒翠壓簷低
兼井未似平州館
屋上層巒屋下溪

金郊驛

山館蕭然爾許清
二更枕簟覺秋生
西窓大好吟詩處
聽了松聲又雨聲

李好復

二首

好復字仲通
安喜人
明昌二年進士
榆次令
有能聲
入為警巡使
嘗以事縛一護衛
道陵有投

鼠之喻出為歷城令終於滑州刺史

邵智夫同游南城

園林晴晝蔚如烟
林外支流盡水田
落日趁墟人已散
鷺鷥飛上渡頭船

雨中與客飲

門外平橋一水分
數聲漁唱隔溪聞
暖風落絮飄香雪
小雨沾花濕夢雲
釀具未甘名長物
詩壇聊欲張吾軍
相逢莫惜通宵飲
明日閒身不屬君

楊祕監邦基 一首

邦基字德懋大定中進士仕至祕書監禮部尚
書文筆字畫有前輩風調世獨以其畫比李伯
時云

墨梅

粉蝶如知合斷魂啼粧先自怨黃昏花光筆底春風老
寂寞嶺南烟雨痕


附金史本傳邦基字德懋華陰人父絢宋末為

易州州佐宗望伐宋蔡靖以燕山降易州即日
來附絢被殺邦基年十餘歲匿僧舍中得免既
長好學天眷二年登進士第調灤州軍事判官
遷太原交城令以廉為河東第一召為禮部主
事大定初除刑部郎中改太府少監知登聞檢
院為秘書少監遷翰林直學士再遷秘書監兼
左諫議大夫修起居注中都警巡使出為同知
西京留守事徙山東東路轉運使永定軍節度

使大定二十一年卒邦基能屬文善畫山水人物尤以畫名當世云

附金詩紀事案中州集以邦基為大定中進士而史復云天眷二年登第相去幾四十年不應懸絕乃爾且名氏相同皆曾官祕書監官禮部皆善畫定非二人史叙其歷官始末甚詳恐中州集所稱官禮部尚書即史所稱主事之誤大約當以史為斷也且燕山降金事在宋宣和七

年即金之天會三年也是時邦基年已十餘歲
若至大定中始舉進士則年逾六十亦未必晚
達如此



御訂全金詩增補中州集卷三十七